

Sabtu, 10 Jun 2017 | 12:43pm

5 ditahan dengan dadah 206kg



Oleh Siti Azila Alias

sitiazila@bh.com.my

KUALA LUMPUR: Lima individu, termasuk dua wanita yang terbabit dengan sindiket penyeludupan pengedaran ganja ditahan dalam tiga serbuan berasingan di Kajang dan Klang, Selangor, Rabu lalu. Tangkapan dilakukan Jabatan Siasatan Jenayah Narkotik (JSJN) bersama elemen Pasukan Khas Taktikal dan Risikan Narkotik (STING) itu turut membawa kepada rampasan 206 ketul ganja bernilai RM618,000.

Pengarah JSJN Bukit Aman, Datuk Seri Mohd Mokhtar Mohd Shariff, berkata turut dirampas dalam serbuan itu adalah tiga kenderaan, termasuk sebuah kereta mewah jenis Audi Q7 bernilai RM304,000 dan wang tunai RM9,000.

Katanya, tangkapan pertama dilakukan terhadap seorang lelaki di sebuah rumah di Taman TTDI Grove, Kajang, pada jam 6.40 pagi dan merampas sejumlah dadah yang disorokkan di dalam kediaman itu serta dalam kenderaan.

"Susulan itu, satu lagi serbuan dilakukan di sebuah kediaman Taman Sentosa Villa, juga di Kajang dan menahan seorang lelaki serta wanita.

"Seterusnya, kita menyerbu sebuah lagi kediaman di Kampung Sungai Udang dekat Klang dan menahan dua lagi suspek, termasuk seorang wanita.

"Kita turut merampas dadah dengan jumlah keseluruhan rampasan dadah 206 kilogram (kg)," katanya pada sidang media di Bukit Aman, hari ini.

Mohd Mokhtar berkata, semua suspek itu adalah saki-baki anggota sindiket yang pernah ditahan di Sungai Petani, Kedah, Mac tahun lalu membabitkan rampasan lebih satu tan ganja.

Beliau berkata, pihaknya percaya masih ada lagi anggota sindiket itu yang masih bebas dan usaha memburu mereka giat dijalankan.

"Sindiket ini adalah sindiket tempatan dan hasil siasatan, semua dadah ini dibawa masuk dari negara jiran untuk pasaran dalam negara," katanya.

Katanya, suspek berusia 30 tahun hingga 47 tahun itu kini direman enam hari sehingga Selasa ini bagi membantu siasatan mengikut Seksyen 39B Akta Dadah Berbahaya 1952.



PENGARAH Jabatan Siasatan Jenayah Narkotik (JSJN), Datuk Seri Mokhtar Mohd Shariff pada sidang media di Ibu pejabat Polis Bukit Aman berhubung rampasan ganja. - Foto Yazit Razali
